



Magnum Bullarium Romanum, Seu Ejusdem Continuatio

Quæ Supplementi loco sit, tum huicce, tum aliis quæ præcesserunt
Editionibus, Romanæ, & Lugdunensi ...

Ab Alexandro VII. Ad Clementem X.

Luxemburgi, MDCCXLII.

CXLVIII. Eximit Fratres, & Conventus Tertii Ordinis Sancti Francisci in
Castellæ, Gallicæ, & Legionis Regnis degentes ab omni jurisdictione
Ministri Provincialis Minorum de Observantia Sancti Jacobi.

[urn:nbn:de:hbz:466:1-74833](https://nbn-resolving.org/urn:nbn:de:hbz:466:1-74833)

nostram diligenter, & accuratè fuerint executioni mandata, composito Indice generali hujusmodi, cui etiam Regulæ Indici Tridentini cum observationibus, & instructione memorato Indici Clementino adjectis appositæ fuerunt; Nos de prædictorum Cardinalium consilio eundem Indicem generalem, sicut præmittitur jussu nostro compositum, atque revisum, & typis Camerae nostræ Apostolicæ jam impressum, & quem præsentibus nostris pro inserto haberi volumus, cum omnibus & singulis in eo contentis auctoritate Apostolica tenore præsentium confirmamus, & approbamus, ac ab omnibus tam Universalibus, quam singularibus personis, ubicumque locorum existentibus, inviolabiliter, & inconcusse observari mandamus, & præcipimus, sub pœnis in Constitutione recolendæ memor. Pii IV. etiam prædecessoris nostri super dicti Indici Tridentini confirmatione edita contentis, ad quas, varietatis veterum Decretorum in proponendis transgredientium pœnis tollendæ gratia, omnes, & singulas pœnas per Constitutiones Apostolicas, & decreta anteriora hujusmodi quomodolibet infirmitas harum serie reducimus, firmis tamen manentibus his quæ de auctoribus, & libris damnatis in litteris Apostolicis die Cœnæ domini publicari solitis sancita sunt, circa quos nihil omnino mutare, ac ne contingere quidem intendimus.

Mandatum
de obser-
vando.

§. 7. Mandantes propterea omnibus, & singulis Venerabilibus Fratribus, Patriarchis, Archiepiscopis, Episcopis, & aliis locorum Ordinarius, necnon dilectis filiis eorum Vicariis, & Officialibus, ac hæreticæ pravitatis Inquisitoribus, & Regularium cujuscumque Ordinis, Congregationis, Societatis, vel Instituti Superioribus, omnibusque aliis, ad quos spectat, & in futurum quomodolibet spectabit, ut hunc generalem Indicem vulgandum, & observandum pro viribus curent; memores ad officii sibi commissi munus pertinere, ut oves Domini gregis tam à pabulis perniciosis arceantur, quam salutaribus impleantur, à quo si (quod absit) per malitiam, aut negligentiam cessent, omnium malorum, quæ inde gravissima, & maxima oriri necesse est, distributam sibi apud severum Judicem reddendam esse rationem.

Contrariis
derogat.

§. 8. Non obstantibus Apostolicis, ac in universalibus, Provincialibusque, & Synodalibus Conciliis editis generalibus, vel specialibus Constitutionibus, & ordinationibus, necnon quibusvis etiam juramento, confirmatione Apostolica, vel quavis firmitate alia roboratis, statutis, & consuetudinibus, privilegiis quoque, indultis, & litteris Apostolicis sub quibuscumque tenoribus, & formis, ac cum quibusvis clausulis, & decretis in contrarium præmissorum quomodolibet concessis, confirmatis, approbatis, & innovatis. Quibus omnibus, & singulis, etiam si pro illorum sufficienti derogatione de illis, eorumque totis tenoribus, specialibus, specifica, expressa, & individua, ac de verbo ad verbum, non autem per clausulas generales idem importantes mentio, seu quævis alia expressio habenda, aut alia exquisita forma ad hoc servanda foret, tenore hujusmodi præsentibus pro plenè, & sufficienter expressis, & insertis, ac formam in illis traditam pro servata habentes, illis alias in suo robore permanentibus ad præmissorum effectum specialiter, & expressè derogamus, cæterisque contrariis quibuscumque.

Transumptorum
fides.

§. 9. Volumus autem, ut earundem præsentium litterarum transumptis, seu exemplis etiam inpressis, manu alicujus Notarii publici subscriptis, & sigillo personæ in Ecclesiastica dignitate constitutæ munitis eadem prorsus fides ubique locorum, & gentium habeatur, quæ ipsis præsentibus habetur, si forent exhibitæ, vel ostensæ.

Dat. P. An. p.
die 5. Jan.

Datum Romæ apud Sanctam Mariam Majorem sub Annulo Piscatoris die 5. Martii 1664. Pontificatus Nostri Anno nono.

Eximit Fratres, & Conventus Tertii Ordinis Sancti Francisci in Castellæ, Gallicæ, & Legionis Regnis degentes ab omni jurisdictione Ministri Provincialis Minorum de Observantia Sancti Jacobi.

ALEXANDER PAPA VII.

Ad futuram rei memoriam.

Nuper pro parte dilectorum filiorum Fratrum Tertii Ordinis Sancti Francisci in Castellæ, ac Gallicæ, & Legionis Regnis degentium Congregationi Venerabilium Fratrum nostrorum S. Rom. Ecclesiæ Cardinalium negotiis, & Consultationibus Episcoporum, & Regularium præpositæ expedito, quod ipsi ægre ferebant eorum ordinem in illis partibus pejorem quotidie in statum prolabi ex eo, quod Superiores ejusdem Ordinis, & Regulæ non haberent, à quibus immediatè regerentur, quodque dudum felicis recordationis Clemens Papa Octavus Prædecessor noster ordinaverat, ut Conventus dicti Ordinis in Lusitania consistentes Ministro Generali Ordinis Fratrum Minorum ejusdem Sancti Francisci de Observantia nuncupatorum, ac Commissario Generali familiæ Ultramontanæ ejusdem Ordinis immediatè subiecti remanentes proprium Ministrorum Provinciale, & Diffinitores sibi eligere possent, eaque ratione multis inconvenientibus obviam itum, optimique effectus ad Dei gloriam, & Religionis incrementum inde consequuti fuerant, sicut experientia compertum erat.

§. 1. Et in eadem expositione subjuncto, quod ipsi Exponentes propterea Conventus in Regnis supradictis constitutos ab omni jurisdictione dilecti filii Ministri Provincialis Provincie S. Jacobi dicti Ordinis Minorum de Observantia eximi, & liberari, sibi que ut dilecto filio Ministro Generali ejusdem Ordinis Minorum de Observantia immediatè subiecti remanentes ab uno Ministro Provinciali, & quatuor Definitores, seu Discretis præfati Tertii Ordinis, qui in Capitulis quolibet triennio, sub præsentia dicti Ministri Generalis, vel Commissarii familiæ Ultramontanæ Ordinis Minorum de Observantia hujusmodi, aut alterius per eos deputandi, juxta dispositionem Constitutionum dicti Tertii Ordinis celebrandis eligi deberent, ad instar Provincialiarum Lusitanie, & Beticæ, non obstantibus recolendæ memoriæ Pii Papæ V. Prædecessoris pariter nostri litteris, quinto nonas Julii 1568. emanatis, quarum initium est, *Ea est officii nostri ratio &c.* de cætero regerentur, & gubernarentur concedi summopere desiderabant: Emanavit ab eadem Congregatione Decretum tenoris, qui sequitur, videlicet.

§. 2. Sacra Congregatio Eminentissimorum Sanctæ Romanæ Ecclesiæ Cardinalium negotiis, & consultationibus Episcoporum, & Regularium præposita, ad quam Sanctissimus Dominus Noster instantiam hujusmodi remisit, attentis narratis, ac audita relatione Ministri Generalis Ordinis, precibus Oratorum benigne annuens, decrevit, & mandavit eosdem Oratores, seu ipsorum Conventus imposterum à jurisdictione Ministri Provincialis Provincie Sancti Jacobi de observantia exemptos, & tantummodo eidem Ministro Generali, & Commissario Generali Familiæ Ultramontanæ immediatè subiectos fore, prout harum serie eximit, ac respectivè subjicit, eidemque Ministro Provinciali injungit, ne ullatenus in eorum gubernium curam, aut quamcumque jurisdictionem se intro-mittat. Insuper eadem Sac. Congregatio statuit, ut deinceps prædicti Oratorum Conventus regantur per Visitatorem Provinciale, Definito-

res, aliosque Officiales ex eorum gremio assumendos, & eligendos, juxta Constitutiones Ordinis, & in reliquis omnibus ad instar Provinciarum Lusitanæ, & Andalusæ præfatarum. Pro hac autem prima vice electio præfatorum Visitatoris Provincialis, Definitorum, & Officialium fiat à dicto Ministro Generali, una cum suo Generali, Definitorio, & ita Sacra Congregatio præsentium vigore decernit, mandat, & statuit, & Nuncio Apostolico apud Regem Hispaniarum pro tempore degenti, committit, ut quatenus opus sit easdem præsentibus omnibus juris, & facti remediis executioni demandari faciat: Prædictis literis Apostolicis sanctæ memoriæ Pii V. cæterisque contrariis, alias in suo robore permanentibus minime obstantibus. Romæ 6. Martii 1664. M. Cardinalis Ginetti.

Confirmat prout in rub.

§. 3. Cum autem sicut præfati Exponentes Nobis subinde exponi fecerunt ipsi Decretum hujusmodi pro firmiori illius subsistentia, & efficacia Apostolicæ confirmationis nostræ patrocinio communiri summopere desiderent. Nos specialem ipsis Exponentibus gratiam facere volentes, & eorum singulares personas à quibusvis excommunicationis, suspensionis, & interdicti, aliisque Ecclesiasticis sententiis, censuris, & pœnis à jure, vel ab homine quavis occasione, vel causa latis, si quibus quomodolibet innodata existunt ad effectum præsentium dumtaxat consequendum harum serie absolventes, & absolutas fore censentes, supplicationibus eorum nomine Nobis super hoc humiliter porrectis inclinati, Decretum præinsertum, auctoritate Apostolica, tenore præsentium approbamus, & confirmamus, illique inviolabilis Apostolicæ firmitatis robur adjicimus, salva tamen semper in præmissis auctoritate præfate Congregationis Cardinalium.

Decretum irritans.

§. 4. Decernentes easdem præsentibus literas semper firmas, validas, & efficaces existere, & fore, suosque plenarios, & integros effectus sortiri, & obtinere, ac dictis Exponentibus plenissimè suffragari, & ab illis ad quos spectat, & pro tempore quoadcumque spectabit inviolabiliter observari. Sicque in præmissis per quoscumque Judices Ordinarios, & delegatos, etiam causarum Palatii Apostolici Auditores judicari, & definiri debere, ac irritum, & inane si quid secus super his à quoquam quavis auctoritate scienter, vel ignoranter contigerit attentari.

Contrariis derogat.

§. 5. Non obstantibus præfatis Pii Prædecessoris literis, ac piæ memoriæ Bonifacii Papæ VIII. etiam prædecessoris nostri de una, & Concilii Generalis de duabus Dietis, dummodo ultra tres dietas aliquis auctoritate præsentium in judicium non trahatur, aliisque Constitutionibus, & Ordinationibus Apostolicis, necnon quatenus opus sit dictorum Ordinum, & Provinciæ Sancti Jacobi, & Conventuum, aliisve quibuslibet etiam juramento, confirmatione Apostolica, vel quavis firmitate alia roboratis statutis, & consuetudinibus, privilegiis quoque, indultis, & literis Apostolicis, in contrarium præmissorum quomodolibet concessis, confirmatis, & innovatis. Quibus omnibus, & singulis illorum tenores præsentibus pro plene, & sufficienter expressis, habentes, illis alias in suo robore permanentibus, ad præmissorum effectum hac vice dumtaxat specialiter, & expresse derogamus, cæterisque contrariis quibuscumque.

Transumptio fides.

§. 6. Volumus autem ut earundem præsentium literarum transumptis, etiam impressis manu alicujus Notarii publici subscriptis, & sigillo personæ in Ecclesiastica dignitate constitutæ munitis, eadem prorsus fides adhibeatur in judicio, & extra illud, quæ præsentibus ipsis adhiberetur, si forent exhibitæ, vel ostensæ.

Dat. P. An. 9. die 26. Mart.

Datum Romæ apud S. Mariam Majorem sub Annulo Piscatoris, die vigesima sexta Mart. anni mill. sexcent. sexag. quarti, Pontificatus Nostri Anno 9.

Quod non liceat Fratribus Minor. de Observantia S. Francisci commorantibus Tolosæ inducere novum Rosarium sub tit. Seraphici; nec facere Processionem Confraternitatis Conceptionis prima Dominica cujuslibet mensis: nec Tabellam exponere, in qua Beata Virgo det Rosarium Sanctis Francisco, & Claræ.

CXLIX.

ALEXANDER PAPA VII.

Edita An. D. 1664.

Ad futuram rei memoriam.

IN supremo militantis Ecclesiæ folio meritis licet imparibus, per ineffabilem Divinæ bonitatis abundantiam constituti, exortas inter Religiosos viros controversias opportunis rationibus dirimere studemus, sicut in Domino conspicimus salubriter expedire.

Exordium.

§. 1. Itaque dilectum filium Procuratorem Generalem Ordinis Prædicatorum specialibus favoribus, & gratiis prosequi volentes, & à quibusvis excommunicationis, suspensionis, & interdicti, aliisque Ecclesiasticis sententiis, censuris, & pœnis à jure, vel ab homine quavis occasione, vel causa latis, si quibus quomodolibet innodatus existit ad effectum præsentium dumtaxat consequendum harum serie absolventes, & absolutum fore censentes.

Absolvit oratores à censuris.

§. 2. Supplicationibus ejus nomine Nobis super hoc humiliter porrectis inclinati, de Venerabilium Fratrum nostrorum S. R. E. Cardinalium Sacris Ritibus Præpositorum consilio auctoritate Apostolica tenore præsentium declaramus ad favorem dilectorum filiorum Fratrum dicti Ordinis Prædicatorum Tolosæ Commorantium non licere dilectis pariter filiis Fratribus Ordinis Minorum S. Francisci de Observantia nuncupatorum, minusque Confraternitati in eorum Ecclesia magni Conventus erectæ sub titulo Conceptionis Sanctissimæ Virginis Immaculatæ, illiusque Confratribus facere Processionem prima Dominica cujuslibet mensis, nec posse prædictos Fratres Ordinis Minorum S. Francisci de Observantia novum Rosarium sub titulo Seraphici, aut novem novendarum, vel alterius rationis inducere, prædicare, & docere, nec in Litanis B. Virginis aliquid innovare, nec tabellam exponere, in qua Beatiss. Virgo Dei Mater det Rosarium Sanctis Francisco, & Claræ prout etiam præfata omnia fieri prohibemus, & servari mandamus.

Prohibet prout in Rubrica.

§. 3. Decernentes easdem præsentibus literas semper firmas, validas, & efficaces existere, & fore, suosque plenarios, & integros effectus sortiri, & obtinere, ac ab illis, ad quos spectat, & pro tempore spectabit inviolabiliter observari. Sicque in præmissis per quoscumque Judices ordinarios, & Delegatos etiam causarum Palatii Apostolici Auditores judicari, & definiri debere, ac irritum, & inane, si secus super his à quoquam quavis auctoritate scienter, vel ignoranter contigerit attentari.

Decretum irritans.

§. 4. Non obstantibus Constitutionibus, & ordinationibus Apostolicis, cæterisque contrariis quibuscumque.

§. 5. Volumus autem, ut earundem præsentium literarum transumptis, seu exemplis etiam impressis, manu alicujus Notarii publici subscriptis, & sigillo personæ in Ecclesiastica dignitate constitutæ munitis eadem prorsus fides in judicio, & extra adhibeatur, quæ præsentibus ipsis adhiberetur, si forent exhibitæ, vel ostensæ.

Transumptio fides.

Datum Romæ apud S. Mariam Majorem sub Annulo Piscatoris, die 28. Maii 1664. Pontificatus Nostri Anno decimo.

Dat. P. A. 10 die 28. Maii.